

La giuventetgna s'annunzia

Emblidà il rumantsch

DA LUCAS DEPLAZES / ANR

■ **En connex cun la campagna «mida la Svizra» han giuvenils or da l'entira Svizra inoltrà passa 700 propostas. Ier han ils exponents preschentà indesch ideas a las medias a Berna che duain vegnir persequitadas vinavant dad indesch politichers giuvenils.** Sin www.engage.ch han giuvenils da tut la Svizra tranter 14 e 25 onns pudì far propostas davart l'avegnir da la Svizra. Cun quest project vul l'organisaziun «Federaziun svizra dals parlaments da la giuventetgna» (FSPG) porscher novas e simplas pussaivladads da s'engaschar sin plaun politic naziunal. Plinavant vulan ils exponents da la giuventetgna politica er demussar che mintgin ha la pussaivladad da muventar insatge a Berna sch'el s'engascha persuerter. Cun questa acziun durant la sessiun da stad dal parlament intenda il sindicat tetgal da pudair motivar la giuventetgna pli stedi per dumondas politicas ed aschia dar furma a ses agen avegnir. L'activitad en il parlament a Berna na saja betg abstracta, mabain lavur en favur da noss futur. Ils postulats da la giuventetgna accentueschan lur giavischs da viver en ina communitad che respecta l'egualitad per tuts.

Da la Valtellina a civic tech

Las pli bleras propostas pertutgan il secur da la sanadad e las ovras socialas. Alura suondan l'ambient, la scolaziun, la mobilitad, la politica, l'economia e la segirtad. Dumondas davart la migraziun giuandan tar la giuventetgna damain prioritad. La gronda part da las reacziuns deriva da la Svizra romanda. La giuventetgna grischuna ha inoltrà 13 propostas. Indesch dals pli giuvenils parlamentaris e parlamentarias èn pronts da s'engaschar



Cédéric Wermuth (pps AG) ha pretendi ina meglra furmaziun e bunas cundiziuns da lavur per il personal da tgira.

KEYSTONE

en il parlament per indesch giavischs. Per *Lukas Reimann* (pps/SG), in dals indesch giuvenils politichers che sa participeschan a l'acziun, è la finamira clera. Grazia ad «engage.ch» pon giuvenils sa far udir e cooperar a l'avegnir da la Svizra. Sin

questa moda daventa la politica concreta. El vegn a s'engaschar per la dismessa dal chasti per maridads. *Marco Romano*, (pps/TI), vul procurar ch'els scolars, ils emprendists ed ils students possian viagnar per mesa taxa. *Cédéric Wermuth*,

(pps/AG), pretenda ina meglra furmaziun e bunas cundiziuns da lavur per il personal da tgira. Curaschi han ils giuvenils demussà cun tschentar la dumonda dal return da la Valtellina a la Svizra. Els vuleschan conuscher il parairi dal cussegl

federal e manar ina discussiun surlonder. Ina ulteriura grappa less dapli engaschi da la Svizra davart il svilup tecnic da la democrazia per pudair activar ed integrar meglier tut quests burgais che na van betg a votar.

Deplorablmain han ils responsabels dal project emblidà il rumantsch. Quai è tant pli da deplorar perquai che gist questa giuventetgna fa ponderaziuns davart l'avegnir da noss pajais. Forsa sa lascha quest sbaglin da bellezza anc curreger.

Tecnica moderna porscha novas pussaivladads

Tar diversas campagnas da demonstraziuns, da votaziuns u d'elecziuns han ils meds socials pudì activar novs interessents giuvenils ed er influenzar il resultat. L'acziun «mida la Svizra» da la «Federaziun svizra dals parlaments da la giuventetgna» (FSPG) demussa cler il success dals novs meds electronics. Da l'enquista dal mais da mars passà è resorti che var la mesadad dals giuvenils s'interessescha per dumondas da la politica naziunala. La pli gronda part dals scolars e da las scolaras giavischa dapli pussaivladads da cooperaziun sin il plaun politic. Necessarias èn dentant novas furmas per ina participaziun pli intensiva dals giuvenils. Cun diversas acziuns vul la societad FSPG integrar pli ferm ils giuvenils e svegliar lur interess là nua ch'els sa chattan en lur mintgadi. L'onn 2018 è previssa ina ulteriura retschertga.